

粵行紀事

瞿文昌著

叢書集成初編

(補印本)

粵行紀事及其他二種

一九三九年十二月初版
一九五九年十月補印

商務印書館出版

上海虹口印刷廠印刷

粵行紀事卷第一

常熟瞿昌文壽明甫著

順治二年乙酉

時江南僭稱弘光元年

四月初一日王父赴粵西巡撫之任昌文方十七歲隨父母同弟昌武送別錢

塘江文以應試先歸月杪至家即聞大清兵下江南督師史閣部揚州盡難之信人情洶洶星馳迎父母歸五月初十日南都不守數日閒大清兵克鎮江常州蘇州尋破嘉湖杭諸郡邑中職方郎嚴君栻兵科時君敏集紳士練義勇謀保一壘文竊料區區下邑不啻彈丸豈能以烏合素不知兵之衆漫爲抗衡而又慮粵西遠在嶺表王父母年俱半百以上膝下無人吾父躬操家柄勢不得不伏處柴桑爲孫者容不作芒鞋省祖事乎城于七月十四日破是時文侍父母竄居山阿刺促不敢聲嗣後病瘡累月兼之兵烽塞途未能爲毅然遠遊計迨丙戌春遙聞浙東魯監國舉義唐王亦卽位閩中至秋而天台不守魯藩航海入閩大清兵進臨僊霞關拔福州唐王走汀州未幾遇害而福州之師取道漳潮進攻粵東江西南贛二郡同時告陷督制楊公廷麟萬公元吉相繼殉難兩粵之勢日蹙文是時省祖之志愈堅且亟而搜捕逆宦之令下矣初邑令洪一緯知府陳服遠行查遠仕未歸者不過徵索饋獻繼而巡撫土國寶巡按梁應龍兵道金一鳳糧道徐逢時推官單父令更有轄屬與地方無涉者總漕吳維華巡江王國楠自戊冬以後勾牌絡繹差承羅布先世清白吏所遺僅供祭掃饘粥之田及圖書畫卷洗括一空而覆巢之下猶

得完卯者。幸丙辰同榜南安洪公承疇。以大學士招撫江南。堅爲保護。邑令瞿公四達。與前蘇州府知府史公應選。爲子女親。其人亦多識見。有膽氣。力爲擔持。撓折當道。文父子不就仕離。然楚囚相對。父母日夕焦勞。且時念王父母睽隔天外。寢食俱廢。稚子不能代憂。又弗忍坐視。唯蚤暮西粵一行。勸王父黃冠還故鄉。願足矣。戊子春三月。陰與趙子秋屋名延策圖南行。而又憂羊腸峻坂。干戈日尋。行旅孔艱。曷克早遂我芒屨省祖之念。濡滯者久之。迺披圖稽道里。屈指計程。知江右徑而塞。浙閩遠而通。第囊橐蕭然。子身襤被。又不能效吹簫乞食之舉。庶幾海道一帆。乘風萬里。可瞬睫閒得之。計定。欲告之父母。知父母必恤體弱。憂少不更事。而嚴止之。舍經從權。且不告而行。行而後告爲便。至親友奴隸。絕不露風。意中同行。唯秋屋是賴。秋屋以親老。不能遽違色養。不忍強之。徘徊濡滯者又數日。適十一月廿四日。旌德劉子文華名又來。語酣。具道粵行故。請偕行。劉慨然曰。子之行。天實佑之也。相辱而大父之知久矣。敢不成子志。維相母年逾七十。弗能以身許友。無已。送子過浙東。開帆航海。子南征。相北返。尋祖奉母。各遂厥志矣。文額手曰。天惠我友。五年契闊。千里枉顧。侯季一言。慷慨悲壯。爲人所難爲之事。成人所難成之志。君之功。小子幸也。駟娑石下一拜。文華遂大笑出門去。行之先一日。別秋屋。未與詳語。歸館沐浴。祈夢兆。得吉。詰旦臘月朔。黎明起拜天地。辭家廟。隨一童子步出東郭塔院。文華已操小舟候河下。使童子他之。解纜。遡行。腰裏無絲絮。止手攜十金。爲先二日姑丈陳子固所遺者。以其半贈文華。寄奉老母。以半爲舟行飯具。貿貿然會不作路歧之慮也。是晚泊葑門。次日過平望。候楊碩父先生乃翁宿王崗涇。次日離家已二

日矣。計家中蹤跡所之。必遣疾足要于路。非初五早渡錢塘。事機阻矣。促篙師曉夜行。初四午至塘棲。風阻舟。身爲負絳。至北新關。日已銜山。疾走湖上。過南屏。昏黑已久。叩老僧無生門。僧見驚訝。問故。語之。僧曰。衲子宵來夢白面少年。朱衣乘馬入山門。子今暮夜過從。作萬里尋親計。吾夢不虛矣。朽衲謹引領望之。抵足談竟夕。翌早。僧出斤金爲贈。復具絮被袍履兼備。微服辭行。過錢塘。抵蕭山。陰風淅烈。趁蒿壩夜行船。更餘至白鶴。舉目不辨路。而盜艘從狹港來。同行舟五二。舟前行被劫。被劫者叫呼聲震。村店居人羣起。逐盜艘。盜艘散。是以獲免。次早過錢清關。越紹興府。初七晚至蒿壩。溯流抵嵎縣。經畫圖山。山石俱蒼綠。閒吐丹砂。若彝鼎色。喬松脩竹。茂密古翠。異鳥鳴翔其閒。耳目爲之一新。登陸至新昌縣。新昌距天台一百五十里。山路陡絕。由關山會士諸嶺。爲白頭出沒之所。以布裹頭。號白頭王。殺掠無虛日。初十蚤。自新昌行五十里。前有山曰班竹。途遇被劫行商數十人。赤身狂奔。號哭動地。同行者無不退縮。離班竹里許。就荒村暫宿。屋舍無人。鍋箸蕩然。是晚大風忽起。三更時雪下盈尺。文密語劉文華曰。山賊飽掠歸巢。當此大雪。明日必不復出。我輩急須過此。無庸再計。文華曰。善。遂冒雪夜行。兩足凍裂。路無煙火。八十里至大經巡司。叩酒壚。借火熏衣。寒稍卻。薄暮至天台。明日曠覽赤城勝概。非復人世境。又明日一百二十里至台州府。隨渡海。八十里至黃巖縣。仍登陸。經盤山。姚輿。金竹諸嶺。峻峻插天。俯臨絕壑。或垂瞰海磯。盤折五日。至樂清縣。水道五十里至管頭驛。二十日乘潮抵江心寺。入溫州城。覓寓。得客店蔣姓家。負行囊入門。見一人對日獨坐。識之。則趙秋屋也。駭愕不知所云。細訊之。方知其受吾父母託。赴武林急追。晤無生。

得曉行狀。遂取道金華、處州。先兩日至甌城者也。秋屋袖出吾父母手諭。絕無責詆語。但恐孱軀弱齡。長途嶮巘。不能遂代父尋親之志。反爲倚門憂耳。且囑秋屋云。可留則與俱歸。春和再理征帆。否則水火患難。藉君之靈。早達桂林。瞿門之福也。文心益慰。次日謁兵憲。孝感感嚴君正矩。語良久。戒勉倍至。居五日。秋屋、文華日至西關外牙僧家。訪海艘音耗。二十七日。遇徽商周明宇者。其人老成練達。期新春初十後發。貨出沙埕埠。同行甚便。約既定。文與秋屋、文華安宿旅次。而是秋浙東水災。米石價陸金。自臘月二十至正月初旬。資釜半匱于珠桂矣。泰順不守。禁各商毋得出洋。三人袖手相對歎歔。當秋屋行時。母氏付路資五十金。命一蠢僕隨行。僕先歸。私語人曰。舍人囊空必遄歸。遂取其資大半去。以故秋屋囊亦罄。若饑餓此土。困將奚告。不得已商酌仍返武林。取道金衢。繇江右入粵爲愈。擇初十日離甌城。早起炊飫熟。值淫雨如注。亭午稍霽。三人挹帶瀕行。而周明宇亟來叩門啓詢之。曰。十三日衆客俱繇瑞安、平陽、金鄉、蒲門陸路出沙埕。特相約同行。聞之喜欲狂。而囊竭矣。文華躍而起曰。子同秋屋隨明宇行至沙埕。應少擔延。相還家料理資釜。往返四十日。刻期良晤。無誤子大事。兼可慰子高堂之望。語畢。肩被卽行。十三日至十九日雨不止。二十日同明宇發温州。廿一日宿瑞安縣。廿三日至平陽縣。山寇又盛。前路留信宿。廿八日始至金鄉衛。次日從大魚山、小魚山渡七溪。海套衝激于危崖之下。波濤最險。幸是日晴和。蚤達蒲門所。所城小而堅。止汛兵五百。譏商旅貨稅籍貫。聽出關。登山行二十五里。卽沙埕。隸福寧州福安縣。有魯藩水師屯泊。而不設備。心竊笑之。至關。則見巨艦以千計。水師居半。俱鄭芝龍叔鴻達弟芝豹輩部領。通

商者也。憩客店程榮九家。爲覓舟開洋達閩之計。二月初十日。有澄濟伯旗幟天離。醫船四號泊岸。登樓見之。心竊喜。先是父命文改名澄。茲海舟有澄濟之號。澄其濟乎。翌日謁其將領水營左協參將吳雄。雄字鳳苞。鐵面劍眉。爽氣磊落。有古豪客風。一見如平生。相得甚歡。卽留宿舟中。談論竟夕。問其還閩之期。在三月月上旬。望文華之至。以刻爲歲。及三月初五日。周明宇貿易事竟。束裝回姑蘇。欲分手去。見文羞澀。舉止謂曰。若途窮矣。卽日食有吳君。而颶風毒霧。長路漫漫。寧能赤手道數千里乎。若必俟劉君至。則海汛風期。機不可失。柰何。遂慨然解囊。貸三十金。文泥首謝之。值初七八九連日風不利。展吉十三。而初十晌午。劉文華同乳夫顧乾初突如其來。持吾父母手諭見示。并白金五十兩。命乾初同秋屋扶助粵行。文仰天額手。幸天作之合。期會不失晷寸。卽日還璧明宇。貸文華更不俟喘息。十二日復子身回虞。慰倚門之望。嗚呼。今人中可概見此等友哉。次早乘東北風。揚帆兩晝夜。達泉州府城外三十里名安海。所登岸宿鳳苞家。二十日謁澄濟伯鄭芝豹。懇其給引照身。越數日覓洋船指粵者不得。緣未至安海之先。揭陽會兵官渡各艘已發。二日復至石井關。訪高州告糴信。漳泉每歲自高雷羅濟。春往夏歸。得鄭標宋姓者舟。歸以語鳳苞。鳳苞曰。南行之舟。何患無之。所以遲遲不遽相告。必擇十分完好。舟子之無他者。乃敢送子前往。今爾心迫矣。容敢滯青雲之羽。初五日至井登舟。鳳苞執手流涕。不忍言別。次日午刻開帆出洋。漭滄浩淼。逸駭耳目。又非前兩晝夜光景。彼中所謂大洋也。依指南車順風所之。舟人額手懽呼。至初八日晡時。颶風暴烈。大雨如注。竟夕不止。與趙秋屋。顧乾初三人相枕藉。桅艙中。蒙頭閉目。但聞危檣格格聲。心膽盡落。

轉念生死唯天命。何庸憂。遂酣睡達旦。詰明雨霽。而驚飈如昨。屋浪雷奔。舟子歛篷繫艚。止隨風播蕩于黑浪中。以小旗標船尾。測風汛。如是者五日夜。十四戌刻。轉北風。揚帆南行。次蚤。舟人瞪目驚訝。不知所之。訊其故。謂船落弱洋迷道。屈交趾地。再叩舟人曰。然則交趾奚若。舟人曰。近交趾海水赤黃也。他處無有少頃。舟人復鼓掌喜相告曰。螺浮海面者。泉清山也。山近高州。水色紅黃。乃淫雨之後。山土崩裂使然。公等勿憂。薄暮入限門界。海中有沙埂者門限。凡三處。十六日天氣晴朗。收泊芷芋鎮。宿文昌閣。祭天妃。安海祈天妃簽兆。有爲君六

月換清風句。

十九日陸行至吳川縣。謁海防同知林悅仁。晚宿梅祿墟。買舟行一百二十里至化州。州爲叛將

李明忠所據。故發部卒分守。十室九空。魂銷飛鏑。從化州雇車輛至陸川縣。淫雨泥濘。盤折五日。汨沒垢面。晤鬱林兵使者。顏可及。方知王父三年來出死入生。幾危復安。歸然南天一柱。履虎尾而不啞也。陸川

一百里至北流縣。北陸俱隸梧州。及容。藤。岑。博四邑。慶國公陳邦傳久自制其疆域。分鎮設官徵糧。驕縱不法。文意不欲入城謁其鎮將。而鎮將陳安國乃王父撫軍時舊部。隨理舟楫相送。從北流至容縣。是五

月初三日。又二宿歷藤縣抵蒼梧。梧郡守束玉。字崑毓。伊兄時泰與吾父壬午同鄉貢。其人丰采英毅。意

氣如雲。晤甚歡話閒。微爲文憾惜狀。叩之。束曰。定興侯何公。

督師閣部何騰蛟字雲從。黎平人。

殉難湘潭。諸勳帥投戈轉

戰。楚疆幅裂。滇將趙印選敗入桂林。全州復陷。西省呼吸如朝露。子代父尋親。寄命風濤。重趼豺虎。得達近郊。復丁陽九。恐不能聚合天倫。承歡膝下。今且貿貿西上。豈不可深慮乎。文疑信不一。怔忡胸臆閒。亟辭別西行。束挽留竟日。趙秋屋密進曰。子冒鋒刃險阻。繭足萬里。得至梧江。子之責重。子之身正不輕也。

逕行前驅。設有不測。不幾使嶺瘴蠻煙。孫不得有其祖。歸雲臥雪。父并不得有其子乎。延年請先往偵風。鶴文領之。適文發寒嘔不能起。因暫息郡署中。秋屋遂行。翌日巡方御史朱由林來相顧。袖出王父四月廿八日手札。桂林保障無恙。但滇營退踞城中。民心士心咸洵洵。讀札竟。心稍安。指數秋屋行期。距七百里。府江灘江迤灘而上。須半月。至瀉湍而下。亦四五日。方達桂林。再由桂林返蒼梧。爲期甚遠。悔一時臆縮。不與秋屋偕行。及十五日。有王父差齋奏官李金鱗。自行在回桂林。時王在肇慶府赴郡給郵傳。文卽欲星夜乘其小舟而上。忽淋雨三晝夜。江水暴長三十餘尺。城不浸者埤垸。竹舍漂溺無算。梧州城外廬屋。皆用大竹。陰陽相合爲瓦。城中唯制府、察院、郡堂三公署依山麓。多高燥。民皆蟻聚焉。越二十三日。水勢漸落。屈指省使相逆之舟。旦夕可至。次日午後。郡役擊梆傳報賊犯境。頃又報。少頃又報。報者接踵至。東君遂露甲乘馬。率家丁飛馳去。文愴恍坐郡齋。薄暮。東君歸。叩其故。言忠貞營李赤心。高必正各勦鎮。從臨武藍山江華永明戰敗。闖入賀縣。躡懷集封川。將屯踞梧州。岌岌勢莫支。赤心者。闖賊李自成養子。自成敗于潼關。帥餘部三十萬衆。自秦出楚。薄洞庭而軍。自成死。赤心統署如故。勢仍負隅。何公騰蛟時爲楚撫。單騎招降。十三營將悉請予通侯爵。王許之。然赤心雖受羈縻。性梟鷲。所過屠戮焚劫無子遺。狼子野心。終未易本來面目也。二十五日黎明。八槳船數百蜂擁江干。百姓倉卒無從逃避。死于賊者半。沒于水者亦半。文及顧乾初隨東君出城登舟。總兵葉承恩。兵道劉嗣寬與東君飛舸逆戰。箭鉤交加。文僅以一箬篷蔽身。幸而獲免。舟乘順流漲急。俄頃過封川。泊江口。鎮道飛檄德慶總兵楊大甫率所部來援。文謂諸當事曰。忠貞固赤眉。

銅馬之流。既受漢家列爵。均王臣也。今喪師失地。闌入郡縣。君輩宜早爲偵探。裁尺素書。規以大義。星馳糧糗。勞其軍。遣一介使止之。合章詣闕下待命。夫安插之宜在本兵。糧餉之撥在司農。乃旣不能報之于先。又不能安之于後。脫激成變亂。咎將誰諉。束等唯唯。宿封川三日。文仍命顧乾初披棘穿嶺。尋訪山間。逕路可通賀縣者。於六月初一日從封川入山。跣足徒步于赤日豐草中。毒瘴瀰漫。行數里。輒昏暈仆地。次日達文德巡司。遇職方高淳魏光庭。相挈同赴開建縣。城中枯樹塞道。熏炙掩鼻。宿城外文昌祠。縣令吳之儀出。袖不掩兩肘。鵠面鳩形。勞瘁不堪。文解囊得束君所贈之少存者。分贈之十金。隨別光庭先行。刺促枳棘山谷中。蹣跚者五日。舉目腐屍。溯流俱牛馬骨血。渴則溯水源。挹其稍清者啜之。十二始達賀縣。足力倍弊。明日覓輿夫。乘小兜而行。晚次鍾山鎮。是夜夢王母夫人來。有悲戚容。雙目失明。對面無一言。覺而驚。方寸如轆轤。及十六日至平樂府。晤郡守朱君議流。驚聞王母夫人竟于五月二十八日病終于大墟舟次。大墟在桂林城東南三十里。是時王父以滇焦兩營主客構鬪之變。坐鎮城中。調諭之不及。視含殮。嗚呼痛哉。文拊膺慟幾絕。次日黎明。從陸路赴省。遇家丁家童數輩于道。細訊王母夫人病革狀。僮輩俱于五月二十一日奉王父差。迎文于梧州。次昭平。聞梧之亂而還平樂者。一切不能悉。晚次陽朔。于縣令龍補憲座。遇同邑王子孫蘭。字方谷。爲糧憲同邑王君奕昌第三子。時重麻經哀毀失容。叩之。其父以督餉入省。轉棹龍門。值滇焦亂兵相追殺。慷慨仗義解諭之。遂遭滇兵之害。王父旣正悍帥法。引咎陳疏。爲請卹典。是日方谷奉其母夫人扶柩厝陽朔。陽朔爲王君舊治地。適至。語次。悉述趙秋屋于五月二十日至桂林。隨下大墟。

請見王母夫人子舟中。詳道文自家奔粵艱苦狀。王母夫人悲過于喜。亟欲一見長孫而不可得。倚艙牖東望。注目神移者累日。廿六夜痰發舊疾作。至廿八日寅刻遽長逝。文五內裂矣。是時新興侯焦公璉駐朔城。不及晤。平旦多覓輿夫。倍道兼行。五十里至翠屏鋪。焦侯健卒馳騎前云。侯立請見。否則且罪某。文卽乘其馬疾回陽朔。興焦侯會晤。語良久。悉知全陽失陷情形。主客構鬪。故焦侯選良騎相送。文仍疾馳抵翠屏。次蚤行九十里。入桂林。拜見王父。痛哭不知所云。古人言相逢是夢中。洵斯謂矣。卽出城。哭王母夫人靈柩于伏波山舟次。永歷三年之六月十九日也。楊碩父初一日占課。斷十九日午刻至。王父以下兆示。共詫爲奇異。附記。

己丑年七夕記于伏波山舟次。孫男昌文遵王父命紀次。

右紀自戊子十二月初一日。由家鄉出門起。至己丑六月十九日抵桂林止。紀乙酉至己丑五年中家鄉閒事甚略。因抵粵後音耗隔絕故也。

粵行紀事卷第二

順治六年己丑六月。昌文旣抵桂林。桂林山水靈異甲天下。文昌門之南有劉仙巖。北門外有明月洞。灘江之東有七星巖。龍隱巖。皆奇峯插天。玲瓏盤折。而伏波山矗立城東。與靖江藩邸中獨秀山對峙。尤爲峻異。至日宿舟次。明蚤登伏波山。謁關壯繆廟。見王父題額曰。學本尊王。又題一聯曰。浩氣塞兩閒。萬古綱常永賴。威靈宣八表。千秋帶礪全憑。凜凜然鞠躬盡瘁之志。上通神明矣。入城請期爲王母治喪。王父痛夫人之變。不得長子視含殮。猶幸一泛海至粵之長孫。興于哭泣之位。而軍機旁午。日督演焦兩營刻期發兵。王父居中調度。轉餉飛檄。手不停批。目不交睫。未暇爲夫人治喪具。至七月初十日。王遣司禮太監貢昇致祭。王母夫人是日靖江王通山通城兩郡王而下。各路勳爵鎮將。地方督撫。按司道府各僚屬。無不辦香弔奠。而小子文。萬里省親。直似奔祖母之喪而至。嗚呼。豈不痛哉。十五日葺治江東草堂。張公同敞顏之曰。小東臯。厝王母夫人靈柩于堂。文積勞復中暑。病甚。承王父命。敘述乙酉七月以後破家情形。并紀文自家泛海入粵。艱難險阻狀。爲粵行小紀。一時張司馬同敞。方中堂以智。吳廷尉德操輩。贈詩成帙。謬相稱許。文謝之曰。此行也。分內事。蹈水火而終得達桂林。劉趙兩君先後左右之力也。王父太息曰。善夫兩君哉。有志者事竟成。爾之謂乎。嗟嗟嶺表。我躬任其難。孫來瘴江。自今以往。收骨有人矣。卽具臣心久已忘家。臣孫隄然入粵。一疏奏王。二十五日閱邸報。見前巡撫魯可藻題疏。言文少年萬里省親。

請照中湘子例。

督師何公騰蛟殉節湘潭。事聞。詔追封中湘文節王。子文瑞先授編修。

特予翰林。以示獎異。王父謂可藻亂紀綱。輕名器。擅請

加官而罪老臣也。卽日具疏駁參之。初一日發。顧乾初從粵東歸家。報王母訃音。是日張公同敞等公疏薦文。并下部議覆。八月初八日。王父六十誕辰。門下士額手前祝。次日初九文生之辰。先數日已患瘡。強起承顏。繼遂大劇。僵臥二十日幾死。噫。半年來。颶風烈日。瘴雨黑霧。及饑寒勞苦驚怖。受之既深。發之自厲。幸而不殞。天也。九月初一日邸報至。部議輔臣某于元年三月奉王諭。晉武英殿大學士少師。兼太子太師。封臨桂伯。廕一子尙寶司司丞。再廕一子錦衣衛指揮同知。輔臣力辭再三。今臣部查閣部大臣俱廕一子中書舍人。輔臣孫昌文應襲廕。授中書科中書舍人。奉命依擬用。文卽叩頭謝恩畢。以病未卽供職。初十日焦新興自全州抱病回陽朔。文往候之。語次憤憤。謂滇營之反客爲主也。文曰。廉藺之事。公豈未之知耶。新興伯曰。謹受教。十六日返棹。經穿山浪石畫山諸勝。十九日還省。適家人吳科至。乃七月二十五日自家鄉來。繇茶陵攸縣出永州。閒道入粵者。接父母手諭。而母氏別有詩篇錄寄。遙和王父己丑元旦之作一首。遙祝王父壽一首。憶文二首。悲笳篇一首。王父覽諸詩。歎贊良久。遂作長歌。凡一千字。授文曰。汝閒關來不及一拜王母顏。予心慙焉。斯篇志之詳矣。汝其珍重勿忘。會楚事告急。十二月廿一日。胡一青于永州白牙橋。與大清兵戰。敗績。是夜滇將普明全軍覆沒。報至。總督兵部張公同敞星馳赴全州。催督各鎮。併力捍禦。時王父病羸。躬行犒師。指授籌畫。廿四日偵卒至。知定南王已入衡州。養馬入春大舉矣。四年元旦。行宮大朝。文隨列班行焉。是日譙撫按勳將。夜闌人靜。燈息。齋中几案閒。忽發煙燄。燒

燬書籍大半。文竊怪不祥。初七夜二更。王父書案閒燈盞錫質者。無故自擲地。分裂三片。又屋瓦無故飛立地上。心益怪之。初十日定南王差官持咨文書啓十餘函達督師。次滇。焦盧楊各勦。大抵陳說天命。指譬人事。王父曰。我豈不知天命耶。願臣節所在死而後已。遣其使而還其書。是月寶豐伯羅成耀棄梅嶺走韶州。大清兵下南雄。過清遠。直逼五羊。王移蹕梧州。王父卽遣文同中軍總兵官徐高至梧迎駕。返桂林。是月戶部尙書吳貞毓。禮部尙書郭之奇。兵部侍郎萬翱。吏科給事中張孝起。朱士鯤等。合疏參左都御史袁彭年。詹事府詹事劉湘客。吏科都給事中丁時魁。工科左給事中金堡。兵科右給事中蒙正發。下詔獄雜問。王父連拜七疏救解之。五君卒得寬釋。時王遣官敦趨方公。以智入直。方公堅請予告。文進言曰。今國步日蹙。驕勦悍鎮。以趙括淖齒之材。倡李傕郭汜之亂。往往釀禍。幾致淪亡。武攸之出幸。龍城之瀕危。近事可鑒。文之祖父老矣。又多病。以先生之才學。內施浴日之功。外具補天之手。翻然入朝。旋乾轉坤。此其時也。方公曰。我輩白面書生。豈能爲救時良相。而亦不忍爲敗國庸臣。于今兩都淪陷。典籍散失。本朝實錄。神宗以後未有成書。卽王御統四年。朝政舉措之大。疆場功罪之實。雖有紀錄。亦未貫以甲子。責在史臣。智也。三世受國恩。蒙王特拔之知。留守相公推轂之重。若得繼先賢任纂修。搦三寸管。續成國史。死且不朽。子其圖之。忽三月十六日。王父手諭至。云曹志建爲大清兵襲敗。棄鎮峽關。恭城永明兩縣界。俗稱龍虎關。走恭城。桂林勢危。命文速還。安葬王母夫人柩。二十日至桂。監軍御史余鵬起來自恭城。述大清兵破關後。旋退紮衡州。人情稍安。而滇營兵疲將悍。日甚一日。趙印選。胡一青互爭總統大閘。四月朔。王父勞師。

全州行次榕江。接塘報。馬進忠得勝于西延大埠。全州軍聲頗振。次日文馳至靈川。晤副將吉大堯。且訊楚事。知粵西萬不可支。秋高馬肥。大清兵勢必直下。城亡與亡。王父決志已久。萬一有變。文一身不足惜。其如父母何。因託趙秋屋覓路于義寧苗峒。而秋屋病不果。事勢亦稍定。廿一日王父遇一品三載考滿加太保。又接中堂札。言經筵將竣。公孫宜速供職。以與大典。廿五日發舟次陽朔。值吳廷桂自家鄉至。出嚴大人手諭。知顧乾初已于正月初十日抵家。家中于接訃音之第三日。成服設位。嗚呼。王母夫人之靈。從此其安綏享室。不復飄泊于龍江粵嶠矣。五月朔。昌文于梧州蒙召對。溫慰有加。面諭內閣王化澄。嚴起恆。傳諭吏部加恩。吏部題覆。改授翰林院簡討。王父閱邸報。即拜資格有祖制可循。一疏。不准辭。復具聖恩無已。臣罪難容。一疏。辭之益力。旋奉祖孫濟美。世掌絲綸之旨。催赴供職。時詔獄案定。爰書頒布中外。袁彭年功多免議。冠帶閒住。劉湘客。蒙正發擬徒。丁時魁。戍靖州衛。金堡。戍清浪衛。俟賊完日發遣。正人遭陷。士氣侵削。王父七疏之後。憤懣不食。文亦不避時忌。朝夕與四君遊。以名節氣誼相砥礪。八月朔。王念楚疆方棘。特面諭守戰事宜。即日辭陞返桂林。十五日提塘官劉希武稟報。據廣州府塘報。叔父元鎔自家鄉泛海入粵。已抵惠州府長樂縣。王父喜動顏色。即遣旗鼓王陳策迎之。文是時庭闈之志亟矣。然念疆事瀕危。軍務倥傯。王父臥不貼席。食不甘味。鬚髮盡白。面目以時刻異。又不忍遽離膝下。廿日同邑陳職方璧字崑良者。亦泛海來至桂林。王父留置幕中。諮議累日。極言紀綱大壞。政地乏主持國事者。天留碩果。相公一人。惟蚤赴行在。以慰聖眷。文曰。有留守得有桂林。有桂林得復潯梧。今王父棄桂林入